

02 JURA



Eine Geschichte von Achim Parterre

Allez-les gars, dä Cheib hole mer, dä mugge mer, dä schnapper mer üs, dä lö mer la mitloufe. Der Stouz vo de Suisse Allemands, der Hirtstouz, der Purestoutz, der Traditionschemp! Crêt de la Neige, Le Reculet. Grand Crêt, Colomby de Gex. Allez-les gars, dä schnappe mer üs! Sit hundertsächsibezg Jahr schiesse si dä Chemp z Interlake über d Matte. 83 Kilo schwär sig er, der sterchscht Schwizer schiesst ne knapp vier Meter wit.

Allez-les gars, dä möge mer, de packe mer, dä schaffe mer. Les vrais béliers: Der Alain vo Soubay, der Jean-Paul vo Bonfol, vo Bémont der Clément u der Guy vo Buix, dä ma lüpfte win e Kran. Le Noirmont, Le Suchet, Le Morond, Le Taureau.

Am dritte Juni vierenachzg stöh der Alain, der Jean-Paul, der Clément, der Guy u vo Cornol d Anne-Marie z Unterseen vor em Museum. Si zahlen Itritt u ir Ingangshalle steit dä Chisu. Lue wi dä härzig driluegt. Wi bsteut u nid abghout. Der Peugeot J (Schi) 7 steit vor em Museum ir blaue Zone mit offener Hecktür. D Annemarie tüscht itz en Ohmachtsafau vor, d Kassefrou chunnt cho z renne u begleitet se in es überümlü. Di vier Manne probiere der Stei z lüpfte. Nom de dieu, qu'est-ce qu'il est lourd! Mont Rond, Mont d'Or, Chasseral.

Si schaffes, dä 167-Pfünder uf d Ladeflächi vom J7 z lege. D Annemarie chunnt itz cho z springe, der Motor louft scho u furt u wägg si si mitsamt em Unspunneitei. Heilanddonner, Stärnesiech Kanonerohr!

Das Stückli us em Kanton Jura geit speter de no witer.
Es touche ganz viü Rösser uf un e berüemte Ritter.
E Botschaftsfrou wo Model isch, e Chemp verziert mit Stärne.
U d Wiudsöu hei de d Widder gschlage, der Südjura blibt Bärner.